

MIDHAT HRNČIĆ – MIDHO



# POGODI

(zagonetke)

Midhat Hrnčić - Midho

# POGODI

(Zagonetke)

Banja Luka  
2002.

Urednik: Zlatan Hrnčić

Recenzenti: Ajša Hadžiahmetović  
Jasna Kasumović

Lektor i korektor: Semira Kalaković

Mojim unukama

Lejli, Selmi i Emini

Naslovna strana: Midhat Hrnčić

Ilustracije:

Prve pisane tragove o zagonetkama i zagonetaštvu, nalazimo u staroj Kini. Odatle se zagoneštvo širi preko: Indije, Perzije, Egipta, Grčke i Rimskog carstva do naših krajeva, odnosno Evrope.

Zagonetaštvom su se bavili i bave mnogi slavni ljudi npr. Ciceron, Leonardo, Mikelandelo, Dante i drugi.

Kod južnoslovenskih naroda, brojni književnici ostavili su traga i u zagonetaštvu. Među njima značajno mjesto zauzimaju Gundulić, Držić, Matoš, Zmaj Jova ...

Pred vama je zbirka zagonetki "POGODI", namjenjena svim uzrastima. U njima, uglavnom, prepoznajemo razne životinje i biljke, pa je to i svojevrsna rimovana biologija. Drugi dio zbirke sadrži zagonetke premetaljke u kojima je sadržana i riječ štampana velikim slovima. U njoj se krije rješenje. Ovo je svakako, uputa za one koji se prvi put susreću sa ovom vrstom zagonetki.

Na kraju knjige je štampana i PODSJETNICA, u kojoj možete provjeriti tačnost svojih rješenja.

1.  
Gricka drvo,  
gricka sir,  
remeti nam  
kućni mir.

2.  
Ubode li,  
jako boli.  
Slatko njeno  
medo voli.

3.  
Mrežu plete -  
ribar nije  
i u uglu  
njenom bdije.

4.  
Zimu prespava,  
možda potrbuške,  
u jazbini sanjajući  
zrele slasne kruške.

5.  
Kada kuca  
šumom ječi,  
ovaj doktor  
drvlje liječi.

6.  
Uporno prede,  
a pređe nema.  
Kada se zamori,  
kraj peći drijema.

7.  
Nepoželjan gost  
na njivi.  
Zbog njega težak  
leđa krivi.

8.  
Faraon nije,  
kroz zemlju die.  
Kud god se kreće,  
niču piramide.

9.  
Možeš mu nuditi  
raznovrsnu hranu,  
uvijek će izabrati  
zrelu bananu.

10.  
Ako neki paša  
u harem mu sleti,  
vidiš kako perje  
na sve strane leti.

11.  
Visoko na grani  
i mama i tata  
uče ga da bude  
dobar akrobata.


12.  
Dugonoga dama  
u crno - bijelom kostimu  
redovno u Africi  
provodi zimu.

13.  
U krošnji drveta  
gnijezdo svije.  
Umiljata, vragolasta,  
a ptica nije.

14.  
Po cijelom tijelu  
tačka, tačka, tačka...  
Miševe ne lovi,  
a ipak nije mačka.

15.  
Noću je budna  
i nečujno leti.  
Prodornim krilcima  
ptičicama prijeti.

16.  
Nije ljekar ni bolničarka,  
niti u domu zdravlja radi,  
ali uvijek, kad je gladna,  
ona stručno krv izvadi.



17.

Taj oklopnik, člankonožac,  
od riba se vješto skriva,  
a kad mu opasnost prijeti,  
on unazad brzo pliva.

18.

Sreća je što hoda bosa,  
a kada to ne bi smjela,  
morala bi da isprazni  
prodavnicu od cipela.

19.

Nije medna  
kao pčela  
oružje im isto -  
strijela.

20.

Glavat jeste,  
nije som.  
Bistra rijeka  
mu je dom.

21.

Duge uši,  
kratak rep,  
svoj je djeci  
mio i lijep.

22.

Plemenito krzno nosi  
i pažnje je dama vrijedna.  
Previsoko glavu drži,  
a spusti je kad je žedna.

23.

Ta punačka dama  
poigrava veselo  
i uvijek nosi odjeću  
u pruge; crno - bijelo.

24.

Rukom, nogom, ili repom  
za grane se vješto hvata.  
U tome je nenadmašan  
taj rođeni akrobata.

25.

Mlada u bijelom,  
a kapima rose,  
ukrasila svoje  
zelene kose.

26.

Djeca rado prate  
njegov lagani let.  
Kad raširi krila,  
podsjeća na cvijet.

27.

Trbušćica ima više,  
a haljina kad je suha  
ispući je domaćica  
i sadržaj skuha.

28.

Šta u torbi sve ne nose  
mame, strine, ujne tete?  
Samo ova brižna majka,  
u torbici nosi dijete.

29.

Tog vojnika iz šumarka  
dugo prati sreća loša.  
Za njega višeg čina nema,  
još uvijek je kopljonoša.

30.

Nije kao druge dame,  
što šešir nose na glavi.  
Ona svoj šeširić,  
uvijek, na nogu stavi.

31.

Za leptira plavca,  
pravi je džin.  
Nikad vojnik nije bio,  
a mornarički nosi čin.

32.

Kad je u opasnosti,  
koristi istu "fintu":  
uključiti mlazni pogon  
i izbaciti tintu.

33.

Pogurena sijeda baka  
proviruje ispod snijega  
i proljeće najavljuje,  
što nam stiže iza brijega.

34.



Vatreno se glasa  
već kad akšam pada.  
To čini zbog sebe,  
zbog sela nikada!

35.

Bez šala i kape,  
golovrat, gologlav  
higijeni u prirodi  
predan je sav.

36.

I kad negdje ide,  
iz kuće ne miče.  
Što se nekom žuri,  
njega se ne tiče.





37.

Ta je ptica ljepotica.  
Odjeća joj čista, žuta.  
Crni su joj samo rep,  
i rukavi od kaputa.

38.


U marljivosti  
samo pčele,  
prvo mjesto  
s`njima dijele.

39.

Krila ima -  
ptica nije.  
Noću leti,  
danju snije.

40.

Krompirolik plod  
sa imenom jedne ptice,  
zu zeleno sočno "meso"  
pojedeš mu i košpice.



41.

Niti morem plovi,  
niti joj je drvena građa,  
ipak terete nosi  
i zovu je pustinjaska lađa.

42.

Operska je primadona,  
u grmlju joj pozornica.  
Još ću malo da pomognem  
s`crnom kapom ta je ptica.

43.

Ovaj konj za trke nije,  
niti bi u štali stanovao.  
Rekao bi ne, hvala  
i u vodi zaplivao.

44.

U rodu je s djetličem.  
Zadatak ima isti.  
Ispod kore drveća  
štetne kukce čisti.

45.

Šeta zu vodu  
u ruhu lijepom.  
Kud god se kreće,  
klati repom.

46.

Pjevač je bez premca.  
Tonovi mu uvijek čisti.  
Prvo mjesto njegovo je,  
na svakoj top - listi.

47.

Otjeraš j, misliš spas,  
al`to traje samo čas.  
Ponovo je opet s nama,  
ta dosadna ljetna dama.

48.

Kad poželi društvo ženke,  
i njen strasni zagrljaj  
u ustima njenim skonča  
kao slasni zalogaj.

49.

Taj oklopnik iz šumarka,  
niti riče, niti pase,  
on iz panja sok ispija  
rogovi mu glavu krase.

50.

Ćuba mu glavu krasi  
i pravi je gizdovac.  
Uzalud mu ta ljepota,  
kad je ptica - smrdljivac.

51.

Nad zemljom trup i ruke.  
Pod zemljom noge i glave.  
Među travama zelen,  
a, ipak, drugačiji trave.

52.

Na jači zvuk  
ili kakav bljesak,  
on zagnjuri glavu  
u pustinjski pijesak.

53.

Kada hoda i kad leti  
noćnom tamom ogrnut,  
bez farova i bez lampe  
osvjetljava sebi put.


54.

Baš niko ne zna  
zašto se stidi.  
Zelenim se ogrne  
da se to ne vidi.

55.

Samo dan  
ili nešto više,  
ovaj krilaš  
vazduh udiše.

Toliko slavi  
na svome piru,  
i život skonča  
u riječnom viru.



56.  
Biljkama su ukras.  
Aerodrom za pčele.  
Suknjicama raznobojnim  
dušu nam vesele.

57.  
Ljeti i zimi  
taj oganj nas grije.  
Tama se od njega  
redovno krije.

58.  
U mladosti zelen -  
jasno se vidi.  
U zrelosti bez razloga  
počne da se stidi.

59.  
Kad je u opasnosti  
dlaka mu se ježi,  
i majci u naručje  
vratolomno bježi.

60.

Po mudrosti znana  
svakom osnovcu.  
U stvarnosti meta  
i osrednjem lovcu.

61.

U odijelu tamnom  
skriven u žbun,  
odaje ga pjesma  
i žućkasti kljun.

62.

Kratak bljesak  
zatim tresak.  
Iznad glava  
čudna slava.

63.

Nit` kupuje,  
niti prosi,  
ali kesu  
uvijek nosi.

PREMETALJKE

64.  
Rado bih za nju  
KOLAČ DAO  
i za trenutak  
sve smazao.

65.  
Ne možeš me  
zvati ČAJEM,  
ali zato  
brašno dajem.

66.  
Prošarana kao ZEBRA  
crno - bijelo.  
Takvo joj je  
stablo cijelo.

67.  
STIL ne mijenja,  
samo boje.  
Ocijelo mu  
isto kroje.

68.  
U njoj BOSA  
možeš biti,  
a nećeš se  
prehladiti.

69.  
Ovo nije VARKA,  
treba da se znade,  
bez nje nema sira,  
a ni čokolade.

70.  
I kad ih je TRISTA  
kao jedan rade.  
Uvijek je u sastavu  
cirkuske parade.

71.  
Povrće jeste,  
ali nije prasa.  
Njiva se pod njom  
zeleno TALASA.

72.

Neobična SLIKA  
a tako živa.  
Među divljim patkama,  
crna koka pliva.

73.

Na livadi kao GOST  
poslije košnje stoji.  
Kad preseli u pojatu,  
kiše se ne boji.

74.

BESANE provodim noći  
gledajući rojeve zvijezda  
kako su na tamnom svodu  
svile svoja gnijezda.

75.

Kad smo pokrov makli,  
u zrnju se CAKLI.  
Čim proljeće cikne,  
iz nje nešto nikne.

76.

MALIKA voli priču  
o pustinjskom princu,  
koji bez bunde šeta  
i u mjesecu prosincu.

77.

Taj ne BOCKA, nego bode  
kad kandžama zgrabi plijen,  
kljunom ga iskomada  
i proguta sve za tren.

78.

Hladni TALAS pokrene je  
na puteve daleke,  
jer mušica tada nema  
iznad naše rijeke.


79.

BULJI BUCA  
sa tvog lica,  
pa se prosu  
i po nosu.



80.  
Ta u BARU  
ne zalazi,  
ali more  
kao da ore.

81.  
Gdje se njene  
kose maste,  
tu TRAVA  
ne raste.



82.  
NA PLIK ti stane.  
Čini razne zloće,  
a kad mu se hoće  
krade čak i voće.

83.  
ZVEKA zveči  
kad se kuje.  
Iz gotovog se  
pjesma čuje.



84.  
Kad na ODAR  
žaba stane,  
ovoj ptici  
jutro svane.

85.  
NAMA ponos nije  
i zato se krije.

86.  
RESKE zvuke čujem  
uvijek kad ga kujem.

87.  
Od njenog PLAMA,  
skriva se tama.

88.  
Kad ribar upozna  
ribu ovu,  
DOPUST provede  
u ribolovu.

89.  
U MLINU se ne melje  
ovaj južni plod.  
Sokom ljude osvježava.  
narandži je rod.

90.  
Prostrt namirisani tepih  
boja čarobno lijepih  
DA VILA po njemu šeta  
u mašti djeteta.

91.  
Dok nabrekne,  
oštre bodlje STEKNE.  
Kad na zemlju padne,  
obrađuje gladne.

92.

Kad pred tobom raširi  
krila kao LASTA,  
putovati lako možeš  
kud te nosi mašta.

93.

U BARI i u rijeci,  
dom je njen.  
Vidri i čovjeku  
dragi je plijen.

94.

REDAK po redak  
i tabla je puna.  
Dobrome đaku  
znanje je kruna.

95.

Namoj da ti  
VOĐA bude.  
On kušnju  
vodi ljude.

96.

On se ne KUPA,  
niti ribari,  
ali za mrežu  
mnogo mari.

97.

Lagan nije, MEKAN nije.  
Ne bere se, niti sije.  
U prirodi vrlo često  
ima svoje čvrsto mjesto.

98.

SA LICA njenog  
ne možeš pročitati  
da se ovaj mali stvor  
zvjerkom može zvati.

99.

Na obali sazidana,  
utvrđena, ušančana,  
a ispred nje kao ruka  
leži LUKA.

100.  
MAZI te po glavi,  
i obraze u crveno boji.  
U njenom ogrtaču  
čovjek se ne znoji.

101.  
Ta ne PLAČE, nego zuji,  
nad livadom i voćnjakom  
svakodnevno praveć slatko,  
koje godi svakom.

102.  
Nije tip za TENIS,  
ali pliva , leti, roni.  
Kad u vodu zaroni,  
s` kesom ribe izroni.

103.  
Ova suma  
BLAGO nije.  
Za njom neko  
suze lije.

104.  
KADIR rado  
harmoniku svira.  
Bez nje nema  
dobrog pira.

105.  
VARKA je,  
to zna svak`,  
da mlijeko daje  
tetrapak.

106.  
Meni OVAS  
hrana nije.  
Tu se moje  
ime krije.

107.  
SIR mu na um  
i ne pada.  
Šumski zec  
od njega strada.

108.  
BOS po snijegu  
bezbržno šeta.  
Studen mu očito  
mnogo ne smeta.

109.  
KOFA vode  
za nju nije.  
Ona morem  
lice mije.

110.  
i kroz ovaj OTKOP  
teče bistra voda,  
a u njoj se ogleda  
dugonoga roda.

111.  
Ko je u stanu ima  
može da ga boli GLAVA,  
a ako je u zemlji  
brzo raste trava.

112.  
Na korici knjige  
napisane davno,  
stoji jedno ime  
već odavno SLAVNO.

113.  
U ljetnje DOBA  
kravama krv proba.

114.  
Uvijek lijepa i mirisna  
od koristi je svima bila.  
Hladila nas, liječila nas,  
presudi joj jedna PILA.

115.  
SPIH, TE sanjah,  
prebiru te prsti majke,  
dok polako usne miče  
kao da mi priča bajke.

116.

ZAR ME ne primjećuješ  
kako je i red?  
Ovdje je pokopan  
tvoj djed.

117.

Bez dobrog strijelca,  
možda nisi znao,  
LUK BAŠ i nije  
oružje pravo.

## PODSJETNICA

- |               |                          |
|---------------|--------------------------|
| 1. Miš        | 29. Jež                  |
| 2. Pčela      | 30. Pečurka              |
| 3. Pauk       | 31. Leptir<br>admiral    |
| 4. Medvjed    | 32. Sipa                 |
| 5. Djetlić    | 33. Visibaba             |
| 6. Mačka      | 34. Pas                  |
| 7. Korov      | 35. Lešinar              |
| 8. Krtica     | 36. Puž                  |
| 9. Majmun     | 37. Vuga                 |
| 10. Pijetao   | 38. Mravi                |
| 11. Majmunče  | 39. Šišmiš               |
| 12. Roda      | 40. Kivi                 |
| 13. Vjeverica | 41. Deva                 |
| 14. Gepard    | 42. Grmuša<br>crnoglava  |
| 15. Sova      | 43. Nilski<br>konj       |
| 16. Komarica  | 44. Žuna                 |
| 17. Rak       | 45. Ptica<br>pastirica   |
| 18. Stonoga   | 46. Slavuj               |
| 19. Osa       | 47. Muha                 |
| 20. Peš       | 48. Mužjak<br>bogomoljke |
| 21. Zec       | 49. Jelenak              |
| 22. Žirafa    | 50. Pupavac              |
| 23. Zebra     | 51. Krompir              |
| 24. Majmun    | 52. Noj                  |
| 25. Breza     | 53. Svitac               |
| 26. Leptir    |                          |
| 27. Mahuna    |                          |
| 28. Kengurica |                          |

- |                            |              |
|----------------------------|--------------|
| 54. Bostan                 | 85. Mana     |
| 55. Vodeni cvijet (insekt) | 86. Ekser    |
| 56. Cvjetovi               | 87. Lampa    |
| 57. Sunce                  | 88. Podust   |
| 58. Paradajz               | 89. Limun    |
| 59. Majmunče               | 90. Livada   |
| 60. Lisica                 | 91. Kesten   |
| 61. Kos                    | 92. Atlas    |
| 62. Munja i grom           | 93. Riba     |
| 63. Nesit                  | 94. Kreda    |
| 64. Čokolada               | 95. Đavo     |
| 65. Ječam                  | 96. Pauk     |
| 66. Breza                  | 97. Kamen    |
| 67. List                   | 98. Lasica   |
| 68. Soba                   | 99. Kula     |
| 69. Krava                  | 100. Zima    |
| 70. Artist                 | 101. Pčela   |
| 71. Salata                 | 102. Nesit   |
| 72. Liska                  | 103. Globa   |
| 73. Stog                   | 104. Dirka   |
| 74. Nebesa                 | 105. Krava   |
| 75. Klica                  | 106. Sova    |
| 76. Kamila                 | 107. Ris     |
| 77. Kobac                  | 108. Sob     |
| 78. Lasta                  | 109. Foka    |
| 79. Bubuljica              | 110. Potok   |
| 80. Bura                   | 111. Vlaga   |
| 81. Vatra                  | 112. Naslov  |
| 82. Klipan                 | 113. Obad    |
| 83. Kavez                  | 114. Lipa    |
| 84. Roda                   | 115. Tespilh |
|                            | 116. Mezar   |
|                            | 117. Bašluk  |

Izdavač:

Za izdavača:

Kompjuterska obrada: Hrnčić Zlatan

Štampa:

Tiraž: